

KECEMERLANGAN TIER 5 HASIL USAHA SEMUA KAKITANGAN UNISEL



Prof Dr Anuar semasa berucap di perhimpunan bulanan di Kampus Shah Alam.

Kejayaan UNISEL mencapai Tier 5 dalam sistem Penarafan Institusi Pengajian Tinggi (IPT) bagi tahun 2013 (SETARA '13) bulan lalu amat membanggakan seluruh warga universiti.

Presiden yang juga merupakan Naib Canselor, Prof Dr Anuar Ahmad mengambil peluang semasa

perhimpunan bulanan mengucapkan terima kasih kepada semua kakitangan yang berusaha sedaya upaya dalam memastikan UNISEL mencapai kejayaan tersebut.

Penarafan ini merupakan satu perkara yang diluar dugaan namun ia berhasil kerana dedikasi kesemua kakitangan yang bekerja dengan bersungguh-sungguh.

Malah kejayaan ini turut dibuktikan dengan penerimaan pelajar-pelajar UNISEL di dalam industri pekerjaan di negara ini.

Sebanyak 82 peratus mendapat pekerjaan selepas graduat manakala 16 peratus pula menyambung pengajian ke peringkat lebih tinggi.

Pencapaian ini juga disifatkan sebagai luar biasa

dalam tempoh UNISEL baru sahaja berusia 15 tahun.

"Syabas kepada semua staf UNISEL yang bekerja dengan penuh dedikasi kerana kalau tak kita tak dapat penarafan cemerlang ini.

"Syarikat-syarikat yang menerima pelajar kita bekerja juga berpuas hati dan pencapaian ini adalah usaha semua pihak yang menerapkan nilai-nilai murni dalam usaha melahirkan profesional yang bermoral," katanya.

Prof Dr Anuar turut berpuas

hati dengan kemudahan WiFi berkelajuan 1GB yang siap dipasang di kedua-dua kampus.

Dengan adanya kemudahan ini proses e-learning yang dirancang dapat dilaksanakan dengan segera.

Kemudahan ini dijangka dapat dipakai sepenuhnya termasuk di asrama Bestari Jaya pada awal tahun ini.

Dalam pada itu, Prof Dr Anuar turut menyatakan latihan bagi kakitangan akan diberi tumpuan tahun ini.

Perancangan rapi sudah dibuat untuk tujuan itu dan antaranya ia melibatkan pertukaran kakitangan ke jabatan-jabatan lain dalam usaha memastikan individu tersebut lebih fleksibel serta berdaya saing.



Kakitangan mendengar ucapan yang disampaikan oleh Prof Dr Anuar.

UNISEL DIBERI PENARAFAN TIER 5 (CEMERLANG) MENERUSI SETARA'13

UNISEL berjaya diberikan penarafan Tier 5 (Cemerlang) menerusi Sistem Penarafan Institusi Pengajian Tinggi (IPT) bagi tahun 2013 (SETARA '13).

Pengumuman penarafan tersebut diperolehi menerusi sepucuk surat dari Agensi Kelayakan Malaysia (MQA) bertarikh 17 November 2014.

Makluman keputusan pencapaian dan perincian markah penarafan SETARA '13 dengan UNISEL memperolehi Tier 5 secara keseluruhan.

Penarafan Institusi Pengajian Tinggi Malaysia 2013 (SETARA '13) disertai 53 buah Institusi Pengajian Tinggi (IPT) di Malaysia.

SETARA '13 mengukur kualiti pengajaran dan pembelajaran pada tahap enam (peringkat Ijazah Pertama) Kerangka Kelayakan Malaysia (Malaysian Qualifications Framework, MQF) dan merupakan kesinambungan kepada Sistem Penarafan Institusi Pengajian Tinggi Malaysia 2011 (SETARA '11) yang dilaksanakan dalam bentuk penilaian semula (review).

Menurut laporan keputusan penarafan, sebanyak tujuh IPT berada di kedudukan Tier 4 dalam SETARA '11 telah meningkat pencapaian ke Tier 5 dalam SETARA '13.

Sebuah IPT yang berada di Tier 3 pula berjaya

meningkat pencapaian ke Tier 4 dalam SETARA '13 manakala 42 IPT mencapai Tier 5 (Cemerlang) dan 11 IPT telah mencapai Tier 4 (Sangat Baik).

Walau bagaimanapun, tiada IPT dalam Tier 6 (Terbilang). Kejayaan diberikan penarafan Tier 5 kepada UNISEL amat bermakna buat semua warga universiti, baik pengurusannya serta para pelajar yang sentiasa menunjukkan komitmen untuk terus memperkasa universiti tercinta ini.

Penarafan ini juga dianggap sebagai hadiah paling bermakna sempena 15 tahun penubuhan UNISEL.

Tidak keterlaluan jika dikatakan kini kita mampu 'duduk sama rendah, berdiri sama tinggi' dengan semua IPT di negara.

Ketahuilah, sesungguhnya usaha merealisasikan apa yang sudah dan sedang dikecapi adalah hasil pemantapan kualiti pendidikan yang dirancang.

Bermula dengan tahap pendidikan dan ilmu pengetahuan yang secukupnya akan mampu



mencorakkan masa depan individu seterusnya menyumbang kepada pembangunan universiti secara tidak langsung.

Ini kerana dengan kualiti pendidikanlah yang akan menentukan hala tuju masyarakat, bangsa dan agama.

Kejayaan ini mengingatkan betapa kita turut bersama membangun dan melakar sejarah universiti, membina nama dan mengubah persepsi.

Dalam hal ini, pengurusan universiti memang serius memastikan kepakaran dan modal insan di UNISEL terus dimantapkan.

Dalam konteks ini, sebagai sebuah universiti pertama Kerajaan Negeri, UNISEL meletakkan 'benchmark' sebagai sebuah universiti yang mampu meningkatkan inovasi dan menyumbang kepada negara.



Prof Dr Anuar menyarungkan kad pelajar kepada Saran yang mengetuai bacaan ikrar pelajar.

SASAR SEMUA FAKULTI CAPAI 20 PERATUS **ANUGERAH DEKAN**

Presiden dan juga Naib Canselor UNISEL, Prof Dr Anuar Ahmad mensasarkan semua fakulti dapat mencapai sekurang-kurangnya 20 peratus graduan yang memperoleh Anugerah Dekan.

Buat masa ini satu fakulti mencapai tahap tersebut manakala dua lagi masing-masing 19 peratus.

Beliau berharap kesemua pelajar baru mendaftar dapat menamatkan pengajian dengan gred sekurang-kurangnya 3.0 ke atas.

Para pelajar dinasihatkan untuk sentiasa fokus di dalam pelajaran dalam memastikan memperoleh keputusan cemerlang.

Dalam pada itu, UNISEL bukan sahaja mahu melahirkan pelajar cemerlang tetapi mereka

yang berakhlak terpuji agar dapat membantu masyarakat pada masa akan datang.

"Saya berharap semua fakulti dapat lahirkan 20 peratus graduan yang capai Anugerah Dekan semasa menamatkan pengajian nanti.

"Sekarang ada tiga yang capai prestasi sebegini dan ini boleh dipertingkatkan lagi," katanya semasa berucap di Majlis Pengenalan Pengurusan Kanan UNISEL di Minggu Tekad Siswa Sesi Januari 2015 di Kampus Shah Alam.

Bacaan ikrar pelajar disempurnakan oleh Saran Jagadesan, 21, yang mengikuti Ijazah Sarjana Muda Perakaunan.

Majlis yang sama turut diadakan di Kampus Bestari Jaya.



Saran membacakan ikrar pelajar dengan penuh bersemangat.

SEBAGAI ANAK JATI SELANGOR SAYA BANGGA DENGAN UNISEL – JALALUDDIN HASSAN



Datuk Jalaluddin (dua, kanan) bersama anaknya Nurul Izzati dan Dekan Fakulti Komputer Sains dan Teknologi Maklumat, Dr Raja Mohd Tariqi Raja Lope Ahmad.

Bukan seorang tetapi tiga anak perempuan pelakon terkenal tanah air, Datuk Jalaluddin Hassan menuntut di UNISEL.

Sebagai anak jati Selangor satu perasaan bangga dengan Universiti Selangor sukar untuk diterjemahkan, menurut beliau ketika ditemui.

Dua daripadanya merupakan pelajar di Fakulti Sains Komputer dan Teknologi Maklumat manakala seorang lagi di Fakulti Perniagaan.

Terbaru, anak ke-6 daripada lapan beradik, Nurul Izzati, 23, berjaya menamatkan pen-

gajian Ijazah Sains Komputer.

Datuk Jalaluddin meluahkan rasa terharu dan bangga dengan kejayaan anaknya ketika ditemui semasa Istiadat Konvokesyen Ke-9.

"Sebagai anak Selangor, saya bangga tiga anak bergraduat di sini (UNISEL) kerana ia besar ertinya bagi saya. Saya gembira mereka berjaya di sini kerana penat lelah sebagai ibu bapa membesarkan mereka dibalas dengan kejayaan ini," katanya

Secara berterus terang, beliau berkata, keputusan menempatkan anaknya di UNISEL adalah berdasarkan reputasi universiti ini.

Tambah beliau lagi, UNISEL merupakan sebuah institut pengajian tinggi yang berkualiti dalam melahirkan pelajar cemerlang selama ini.

Berbicara lebih luas apabila disoal berkenaan pelbagai isu yang cuba dimainkan terhadap UNISEL, beliau menyifatkan tindakan itu tidak wajar.

"Universiti tidak seharusnya dijadikan medan politik, saya tidak terkesan.

"Bahkan saya tidak sangsi langsung untuk menghantar anak belajar di sini selama ini," katanya.

Beliau berpesan serta berharap agar UNISEL terus cemerlang dan mampu melahirkan lebih ramai anak muda yang berpendidikan tinggi di negara khususnya anak Selangor.